

水腫門

水脹通論

論水氣證治大法

脉經敘諸水形證

羅大無治

許魯齋藥案

仲景治水大法

脹滿門

一名鼓脹

鼓脹說

虫蠱

痞氣門

赤水玄珠第五卷

新安生生子孫一奎集

水脹通論

靈樞經曰水穀入于口輸于腸胃其液別為五天寒衣薄則為渴與氣天熱衣厚則為汗悲哀氣并則為泣中焦胃緩則為唾邪氣內逆則氣為之閉塞而不行不行則為水脹余知其然也不知其何由生願聞其道岐伯曰五穀之津液和合而為膏者內滲入於骨空補益腦髓而下流於陰股陰陽不和則使液溢而下流于陰髓液皆減而下下過度則虛下過度謂房勞過度也故腰背痛而脛痠陰陽氣道不通四海塞閉三焦不瀉津液不化水穀并

行腸胃之中別于迴腸留于下焦得不滲膀胱則下焦脹水溢則爲水脹

黃帝問于岐伯曰水與膚脹鼓脹腸覃石瘕何以別之岐伯答曰水始起也目窠上微腫如新臥起之狀其頸脈動時欬陰股間寒足頸腫腹乃大其水已成矣以手按其腹隨手而起如裹水之狀此其候也帝曰膚脹何以候之岐伯曰膚脹者寒氣客于皮膚之間蹙蹙然不堅腹大身盡腫皮厚按其股窅然而不起腹色不變此其候也鼓脹何如岐伯曰腹脹身皆大大與腹脹等也色蒼黃腹筋起此其候也腸覃何如岐伯曰寒氣客于腸外與衛氣相搏氣不得榮因有所擊癥而內著惡氣乃

起瘕肉乃生其始生也大如雞卵稍以益大至其成則
懷子之狀久者離歲按之則堅推之則移月事以時下
此其候也石痕何如岐伯曰石痕生于胞中寒氣客于
子門子門閉塞不得通惡血當瀉不瀉衄以留止日以
益大狀如懷子月事不以時下皆生于女子可導而下
帝曰膚脹鼓脹可刺耶岐伯曰先刺其脹之血絡後調
其經刺去其血絡也 石水臍以下腫其脉沉

本事方云臍腹四肢悉腫者爲水但腹脹四肢不甚腫爲
蠱 蠱卽鼓脹也

厥目云水脹皆本于房勞過度

水腫 出素問水熱穴論

黃帝問曰少陰何以主腎腎何以主水岐伯對曰腎者至陰也至陰者盛水也肺者太陰也少陰者冬脉也故其本在腎其末在肺皆積水也帝曰腎何以能聚水而生病岐伯曰腎者胃之關也關門不利故聚水而從其類也上下溢于皮膚故為臃腫臃腫者聚水而生病也帝曰諸水皆生于腎乎岐伯曰腎者牝臟也地氣上者屬于腎而生水液也故曰至陰勇而勞甚腎汗出腎汗出逢于風內不得入于臟腑外不得越于皮膚客于玄府行于皮裏傳為臃腫本之于腎名曰風水所謂玄府汗孔也帝曰水俞五十七處者是何主也岐伯曰腎俞五十七穴積陰之所聚也水所從出入也尻上五行行五

者此腎俞故水病下為胛腫大腹上為喘呼不得臥者
標本俱病故肺為喘呼腎為水腫肺為逆不得臥分為
相輸俱受者水氣之所留也肺腎之標本其上下分為
緣此二臟乃水伏菟上各二行行五者此腎之街也三
氣之所留故也陰之所交結于脚也踝上各一行行六者此腎脈之下
行也名曰太衝凡五十七穴者皆臟之陰絡水之所容
也

尻上五行行五

脊中一

懸樞一

命門一

腰俞一

長強一

大陽俞一

小腸俞二

膀胱俞二

中膂內

俞二

白環俞二

胃倉二

盲門二

志室二 胞盲二 秩邊二

伏菟上各二 行行五

中注二 四滿二 氣穴二 大赫二 橫骨二

外陵二 大巨二 水道二 歸來二 氣街二

蹠上各一行行六

太衝二 復溜二 陰穀二 照海二 交信二

築賓二

甲乙經云身腫關門主之 水腫脹皮腫三里主之

風水膠腫巨虛上廉主之 風水面附腫顏黑解溪主之

風水面附腫衡陽主之 水中留飲胸脇支滿刺陷谷出

血立已面附腫上星主之 先取諱諱後取天瀾風池 水腫人中盡

滿唇反者死水溝主之 水腫大臍平灸臍中無理不

治

內經曰三陰結謂之水王註云謂脾肺之脉俱寒結也

又曰下焦溢而爲水王註曰下焦爲分注之所氣窒不
瀉則溢而爲水

黃帝問曰有病腎風者面附龐然壅害于言可刺否岐伯
曰虛不當刺不當刺而刺後五日其氣必至帝曰其至
何如岐伯曰至必少氣時熱時熱從胸背上至頭汗出
手熱口乾苦渴小便黃目下腫難以行月事不來煩而
不能食不能正偃正偃則咳病名曰風水論在刺法中
帝曰願聞其說岐伯曰邪之所湊其氣必虛陰虛者

必湊之故水氣時熱而汗出也小便黃者少腹中有熱也不能正偃者胃中不和也正偃則欬甚上迫肺也諸有水氣者微腫先見于目下也曰何以言之岐伯曰水者陰也目者亦陰也腹者至陰之所居故水在腹者必使目下腫也真氣上逆故口苦舌乾臥不得正偃正偃則咳出清水也諸水病者不得臥臥則驚驚則咳甚也腹中鳴者病本于胃也薄脾則煩不能食食不能下者胃脘隔也身重難以行者胃脉在足也月事不來者胞脉閉也胞脉者屬心而絡于胞中今氣上迫肺心氣不得下通故月事不來也

針經曰肢脛者人之管以趨翔也莖垂者身中之機陰精

之候津液之道也故飲食不節喜怒不時津液內溢乃下流于翠血道不通口大不休俛仰不便趨不能此榮然有水上下也

劉宗厚曰按內經諸水氣皆諸臟本病也針經所引則又主飲食及七情等因皆致之可見病機之微矣但有濕腫氣腫初亦頗相似然以手按之成凹不即起者濕也濕與水有微甚之意况有氣腫及諸水形證不同要在臨症詳審也

水腫有陽水陰水之分若脉來沉伏面色青白不煩渴小便澀而清大便溏泄爲陰水治宜實脾脉來沉數面色赤黃或煩渴小便赤而難大便秘治宜疎氣蕩滌

論水氣證治大法

內經曰不從毫毛病生于內者陰氣內盛陽氣竭絕不得入于腹中故言五臟陽以竭也津液者水也充郭皮中陰蓄于內水氣脹滿上攻于肺肺氣孤危魄者肺神腎爲水害子不救母故云其魄獨居也夫陰精損削于內陽氣耗減于外則三焦閉溢水道不通水滿皮膚身體否腫故云形不可與衣相保也凡此之類皆四肢脉數急而內鼓動于肺中也肺動者謂氣急而效也如是者皆水氣格拒于腹膜之內浮腫施張于身形之外欲窮標本其可得乎平治權衡謂察脉浮沉也脉浮爲在表脉沉爲在裏在裏者泄之在表者汗之故云開鬼門潔

淨府也去宛陳莖謂去積久之水物猶如草莖之不可
留于身中也

劉宗厚曰按經論水氣證治至爲機密故云開鬼門潔淨
府然鬼門者猶幽玄之謂有毛竅而不見其開闔邪氣
感入邪與正相搏毛竅閉塞而寒熱作爲病客于表故
宜發汗遣邪氣以開鬼門也此亦發汗之別稱泄諸病
在表之通例也淨府者謂膀胱內無入孔而外有出竅
爲清淨津液之府憑腎氣藏氣化水穀之精而滲入脬
中氣約成溺出也夫腎主下焦司闔闢開竅二陰肺脾
之氣通調水道下輸膀胱氣化水行而自清淨否則便
澀或濁或淋爲水氣溢于腠理爲膚腫諸病若宛屈踈

莖壅滯于身中當泄去是物而潔淨宜此二法在表者
汗之在裏者泄之權衡于治也雖然經云水病本之于
肺腎二經而古今方論並不以治水獨瀉腎氣爲說者
何蓋腎陰奉行降令爲生化之源而常不足至陰精損
削于內生氣不能運化至爲臍腫其氣索矣况肺弱而
母氣孤危者乎故東垣曰若治以甘淡滲泄陽藥獨陽
無陰其欲化得乎此探蘊已上治例之妙也如積飲傷脾
若土之于雨中則爲坭矣或因七情所致手足太陰俱
病身浮腫似水氣用燥脾導氣之劑卽愈一則若坭土
之得和風暖日水濕去而陽化自然萬物生長一則肺
氣開泄滲道通利水氣不濡于脾矣此正諸濕腫滿皆

屬脾土諸氣臏鬱皆屬于肺而與陰陽爲病水氣機之不同故亦不待開鬼門潔淨府而已也

原病式謂水腫爲濕熱實甚故治以辛苦寒藥蓋以辛散結而苦燥濕以寒除熱而隨其利濕去結散熱退氣而愈而謂脾虛不能制水之說爲非

丹溪以水腫由脾虛不能制水故水漬妄行當以參朮補脾使脾健則自能轉運而水自行但宜補中行濕利小便便爲上

劉宗厚曰按劉河間以水腫爲濕熱謂在表有熱宜汗謂在裏有熱宜下治法宜開鬼門潔淨府蓋言有餘之證然也丹溪以脾虛不能制水治當補中行濕利小便蓋

言不足之證然也若夫滋腎制火之說愚切以爲未當
蓋補腎之藥乃陰滯柔潤適以滋濕耳豈理也哉今治
此證但脾虛受濕爲不足所致者宜燥脾土兼利小便
若非氣鬱飲食濕熱所致者禁不得妄下證雖可下又
當權其輕重不可過用芫花大戟甘遂猛峻之劑暫時
快利水氣復來而無以治之也少壯充實脈洪大有力
者當導去其水年老虛人得此惟當補中行濕爲先設
或元氣下陷者卽又當升提之

古方十種證候以短氣不得臥爲心水兩脇疼痛爲肝水
大便鴨溏爲肺水四肢苦重爲脾水腰痛足冷爲腎水
口苦咽乾爲膽水乍虛乍實爲大腸水腹急肢瘦爲膀胱

脫水小便秘澁爲胃水小腹急滿爲小腸水以此十水
爲正水外有風水皮水石水黃汗風水又有風腫氣腫
血腫風腫者皮粗麻木不仁走注疼痛氣腫者皮厚四
肢瘦削腹脇脹膨至若煩躁漱水迷忘驚狂嘔逆煩悶
皮間有紅縷赤痕者此血腫也媼人經脉壅閉敗血停
腐尤多見此妊娠亦有氣遏水道而虛腫者此但順氣
安脾飲食無阻旣產而腫自消若產後發虛則虛退而
告殂矣

大抵浮腫之脉帶數卽是虛寒潛止其間久必沉伏沉伏
則陽虛陰實爲水必矣 面龐然浮腫疼痛其色始黑

黑多汗惡風者屬腎風

治見風證

諸唇黑則傷脾缺盆平則傷心臍出則傷肝足心平則傷
腎背平則傷肺凡此五傷必不可治

大凡水腫先起于腹而後散于四肢者生先起于四肢而
後入腹者死至若鼓脹而肚上青筋脹滿而大便滑泄
久瘧而轉作虛浮又兼見前五傷則死矣與夫男從脚
上腫而上女從上腫而下或肉硬或掌心平而無紋皆
不治

論生死脉法

水病脉洪大者可治微細者不可治水病脹閉其脉浮大
數者生沉細虛小者死水病腹大如鼓脉虛者死實者
生